


ՀԱՅԲԱՊԵՏԱԿԱՆ
ԿՈՆԳՐԱԿՆԵՐ



ՕՐՀՆՈՒԹԵԱՆ
ԳՐԵՐ

**Ն. Ս. Օ. Տ. Տ. ԳԱՐԵԳԻՆ Բ. ԱՍԵՆԱՅՆ ՀԱՅՈՑ ԿԱԹՈՂԻԿՈՍԻ ԽՈՍՔԸ
ՍԱՐՍԵԼԻ ՍՐԲՈՑ ԹԱՐԳԱՆՉԱՅ ԵԿԵՂԵՑՈՒՄ ՀՐԱՇԱՓԱՌԻ
ԱՐԱՐՈՂՈՒԹՅԱՆ ԸՆԹԱՅՔՈՒՄ**

(4 դեկտեմբերի, 2025 թ.)

*Գերաշնորհ Սրբազան,
Շնորհազարդ հոգևոր հայրեր,
Ֆրանսիայի իշխանությանց պատվարժան պետական այրեր,
Մեծարգո պարոն հյուպատոս,
Սիրելի բարեպաշտ հայորդիներ,*

Գոհությու՛ն եւ փառք ենք մատուցում Բարձրյալին, որ Մեզ առիթն ընձեռեց վերստին այցելելու Ֆրանսիայի Հայոց թեմ, Մարսելի Սրբոց Թարգմանչաց Եկեղեցի՝ Սուրբ Էջմիածնից Հայրապետական Մեր սերն ու օրհնությունը բերելու ամենքիդ եւ ձեզ հետ աղոթք բարձրացնելու առ Աստված այս հոյակերտ տաճարի նվիրական կամարների ներքո:

Մեծ մխիթարություն է Հայրապետիս համար, որ ամուր է ազգանվիրումի եւ եկեղեցասիրության ոգին Ֆրանսիայում բնակվող մեր հավատավոր զավակների, ինչի լավագույն վկայությունն է Հայոց Եկեղեցու հովանու ներքո ձեր աշխույժ ազգային, հոգևոր կյանքը: Ի սփյուռս աշխարհի հանուր հայության կյանքում Առաքելական Մեր Սուրբ Եկեղեցին է, որ տերունապատվեր առաքելությամբ համախմբում է հայ ժողովրդին եւ Աստծո օրհնաբեր Աջի ներքո անսասան պահում նրա ազգային-քրիստոնեական դիմագիծը: Դարեր շարունակ Եկեղեցին է եղել եւ այսօր էլ շարունակում է լինել մեր ժողովրդի կրթողն ու դաստիարակը, հավատով եւ ազգային արժեքներով սնուցողը: Եկեղեցին է, որ զորացնում է ամենքիս դժվարությունների ու մարտահրավերների դեմ պայքարում, քաջալերում եւ ոգեշնչում նոր արարումների՝ հանուն ազգիս

բարօր ներկայի եւ պայծառ գալիքի: Եկեղեցին սոսկ քարեղեն կառույց չէ, այլ հավատացյալ մեր ժողովրդի հավաքականությունն է: Եկեղեցին դուք եք, սիրելի հավատավոր զավակներ, բարեպաշտ ձեր կյանքով ու աստվածահաճո գործերով, առաքելական խոսքի համաձայն՝ «տաճար Հոգւոյն Սրբոյ էք, անդամները Քրիստոսի խորհրդական մարմնի»: Արդարեւ, մեր ժողովրդի դարավոր պատմությունը հար եւ նման է Փրկչի երկրավոր կյանքի ընթացքին: Եղել են շարշարանքներ, զրկանքներ ու փորձություններ, Ցեղասպանության գողգոթա, բայց հարություն հավատքի հաղթանակն է պսակել հարատեւությունը մեր ժողովրդի եւ մեր Սուրբ Եկեղեցու՝ ամրապնդելով մեր ընթացքը դեպի բարօր ու լուսավոր կյանք:

Այսօր նույնպես մեր հայրենիքը եւ Հայոց Եկեղեցին անցնում են դժվարությունների ու մեծ մարտահրավերների միջով: Անցնող հինգ տարիների ընթացքում Արցախյան պատերազմի, Արցախի հայաթափման եւ մեր հոգեւոր-մշակութային արժեքների ոչնչացմանն ուղղված Ադրբեջանի քաղաքականության հետեւանքով դեռեւս արնահոսում են ազգիս զավակների սրտերը: Շարունակում են բաց մնալ արցախահայության իրավունքների պաշտպանության, Ադրբեջանում գերության մեջ պահվող հայորդիների ազատ արձակման եւ շրնդհատվող մշակութային ցեղասպանությունը կասեցնելու հարցերը, որոնք կարոտ են ամենքիս միասնական ջանքերի եւ հետեւողականության: Հայրենիքում տիրող դժվարին իրավիճակում խիստ մտահոգիչ է նաեւ իշխանությունների որդեգրած հակաեկեղեցական քաղաքականությունը, որով ապօրինի քայլեր եւ բռնաճնշումներ են սանձազերծվել Մայր Աթոռի եւ բարձրաստիճան եկեղեցականության դեմ: Գիտեք, որ անազատության մեջ են գտնվում երեք Սրբազաններ, ազգային մեծ բարերարը եւ այլ հայորդիներ: Տեղեկացանք, որ այսօր եւս մեկ Սրբազան՝ Արշակ արքեպիսկոպոս Խաչատրյանը, ձերբակալված է կալանքի տանելու համար: Սիրելիներ, մեր ժողովրդի միասնականության, հավատի եւ առ Եկեղեցին հավատարմության շնորհիվ, լիահույս ենք, որ կհաղթահարվի այս փորձությունը, եւ կչեզոքացվեն շարամիտ այս ոտնձգությունները:

Հրաշափառի այս արարողությունը ողջունում ենք ներկայությունը պետական պաշտոնյաների, Մարսելի բարձրապատիվ արքեպիսկոպոս, կարդինալ Ժան Մարկ Ավրլինի, մեր քույր Եկեղեցիների ներկայացուցիչների, որոնց հետ հարաբերությունները հատկանշված են համերաշխության ու սիրո ոգով: Մեր միասնական աղոթական ջանքերով ու գործակ-

ցությամբ է, որ նոր ժամանակներում պիտի կարողանանք Տիրոջ Ավետարանի լույսն ու պատգամը բերել եւ սփռել մարդկության կյանքում՝ հաղթահարելու համար արդի աշխարհի մարտահրավերներն ու խնդիրները:

Սիրելի հայորդիներ, վերստին Մեր օրհնությունն ենք բերում ձեզ ամենքիդ: Մեր գնահատանքն ենք հայտնում թեմակալ բարեջան առաջնորդ Գրիգոր եպիսկոպոս Խաչատրյանին, Ֆրանսիայի եւ Մարսելի հայկական եկեղեցիներում ծառայող մեր սիրելի հոգեւոր սպասավորներին, թեմական, համայնքային վարչությանց անդամներին, Սրբոց Թարգմանչաց եկեղեցու ատենապետ տիար Ռոպեր Ազիլազյանին եւ մաղթում առավել կորով ու եռանդ՝ Մարսելի համայնքում պայծառություն ու բարօրություն հավելելու եւ Ֆրանսիայի Հայոց թեմի ազգային-եկեղեցական կյանքը նոր իրագործումներով հարստացնելու համար:

Աղոթում ենք, որ հաստատուն լինեք առ Քրիստոս մեր Տերը նվիրումի ու հավատարմության մեջ եւ հարատեւ զորանաք հավատքով, հույսով ու սիրով: Հայցում ենք Երկնավորից, որ խաղաղ պահի Ֆրանսիայի Հանրապետությունը, Իր շնորհների եւ օրհնության ներքո՝ նրա բարեսեր ժողովրդին եւ պայծառ պահպանի Ֆրանսահայոց թեմը՝ առատապես օրհնելով ձեզ, ձեր կյանքն ու բարի գործերը:

